

nopolitanae Academiae tribuuntur; uti docent ad eam leg. Bartolus, qui & alia ibi privilegia commemorat. In ea Baldus Ius civile professus est, tanta gloria, ut summus Iuris commmentator, & terrestre quoddam Numen vocaretur. Septuaginta in ea sunt Iuris Doctores, & quibus quinque & viginti Ius continuo docent; aliis artibus disciplinisque vix in Perusia locus est. Ad Servos Mariae tumulus est Baldi. Baldo Perusino utriusque Iuris consultissimo, filii pientissimi faciendum curarunt, probaveruntque. Vixit annos LXVI, menses X, dies VI. Obiit M CCCC XC, die XXII Sept.

*Interpres utriusque juris ingens,
Orbis gloria, patrie decusque,
Hic Baldus jacet ille Bartholinus.
Hui? Baldum haud tegit hoc, sed ossa Baldi,
Marmor, fama nitens volat superstes,
Caelum spiritus innocens recurrit.
Dic Lector vale & hinc recede felix.*

Collegia. Petrus Anchoranus inter Italiae urbes Iuris prudentia floruisse Perusum scribit. Amplissima sunt collegia, in quibus annuo censu Vitae subsidia Studiosis suppeditantur. Est inter alia *Collegium Vetus & Novum*, vulgo *Sapientia Vetus & Nova*: quarum illa D. Gregorio sacra, Episcopo loci, ut Provisori; Haec D. Hieronymo dicata, Priori Canonico Cathedralis Perusinae, & Consulibus Mercantiae vulgo, paret. Apud S. Dominicum insignis est Bibliotheca.

Bibliotheca.
Ager. Agro Perusino, etsi multas adierit & lustraverit regiones Ioannes Campanus, nullam tamen cultiorem amoenioremque se unquam cognovisse scribit. Vasta omnia & montosa prius inveniunt, quum autem propius accedis, nihil cum agrorum cultu, tum benignitate coeli, terraeque ubertate felicius. Ager sane fructiferis iucundisque adsurgit collibus; qui vini, olei, ficuum, pomorum, aliorumque optimorum fructuum fertiles. Campi adjacent, tritico ceteroque frumento copiosi. Peculiare de hac Urbe edidit opusculum Marius Podianus Orator insignis.

Non longè à Perusia est Cerquetum, & trans amnem Gestorem oppida Mons Petriolus, Mercatellum, Mons Vejanus, Campinianum, Marcianum, Collis longus, Ripa-bella, Mons Castellum & Cervaria.

Lacus Thrasymenus, qui & Perusinus. Inter Perusiam atque Cortonam magnus conspicitur lacus, qui vulgo nunc Lago di Perugia adcolis dicitur, id est, Perusinus lacus: at olim Graecis Θρασυμένη λίμνη, Latinis Thrasymenus lacus vocitabatur. Insignitus est ingenti illa clade, quam heic secundo bello Punico ab Hannibale acceperunt Romani: eoque nomine Graecis juxta ac Latinis monumentis maxime celebratur. Hannibal, Arretium & castra Flaminii praetervectus, inter Cortonenfis monteis &

lacum Thrasymenum, qua hodieque celeberrimum est à Florentia Perusiam comitantibus iter, contendit in vallem, quae secundum lacum inter vicum Ossariam & oppidum Passinianum longitudine sua v ferme occupat millia passuum. in medio hoc spatio domus à situ vulgarem appellationem habet *la casa del piano*, id est, *Domus planitie*. latitudinem vallis colligit brevis amniculus, ab opidulo, unde in lacum profluit, vulgo *Fiume di Sanguino*, sive *Sanguinetto* dictus. ipsi oppidulo imminet Polybii ille collis natura munitus atque inaccessus, qui vallem ab hac parte claudit: castellum ei postea à Romanis impositum fuisse, indicant rudera quaedam, vulgo adcolentium hodie *Reliquie di Trasimena*, sive *Trasimena rovinata* dicta: quia opidum heic olim nomine Thrasymenum existisse sibi persuadent. Ceterum primae vallis fauces, sive, ut Livius, saltus primus, per quem vallis ab Arretio advenientibus aditur, est apud praedictum vicum: qui ab ipsa Romanorum clade nomen per tot saecula ad hanc nostram aetatem tulisse putatur *Ossaria*; vulgo *Ossaia*, & corruptius *Orsaia*, ab ossibus ubique sparsis, dictus: unde ego etiam amniculum illum & opidulum supradictum *Sanguinei* nomen accepisse existimo. Alter saltus, sive angustiae secundae clauduntur ipso opidulo *Passiniano*. At haec duo loca à dicto colle protenduntur utrimque colles alti atque continui, qui duo latera vallis cingunt. apud dextrum latus Hannibal ipse collem, qui super Passinianum fauces secundas coarctat, cum Hispanis Afrisque insedit; inde Baleareis & ceteram laevam armaturam in tumorum dextrum hoc latus claudentium vallibus locavit: equites vero & Gallos sinistri lateris tumulis occultavit, longa serie ad ipsas usque primas fauces & vicum Ossariam porrectos. Itaque Flaminius, Arretio Hannibalem consequens, cum exercitu ingressus, id tantum hostium, quod adversa in fronte apud Passinianum erat, conspexit, mox à tergo & à sinistra undique ex pluribus praedictorum tumorum vallibus hinc equites etiam atque Galli, inde Baleares & ceteri levis armaturae milites in eum coorti sunt; à dextra fugam etiam prohibente ipso lacu. Et haec est, ut inquit Livius, nobilis illa ad Thrasymenum pugna, atque inter paucas memorata populi Romani clades. *Quindecim millia Romanorum in acie caesa sunt. decem millia sparsa fuga per omnem Etruriam diversis itineribus Romam periere. mille & quingenti hostium in acie, multi postea utrimque ex vulneribus periere. Sed & sex millia, quae per adversos hostes, eruptione impigre facta, ex salu evaserant, postero die capta sunt.*